

夢占類考

夢占類考卷五

長洲張起編

棟宇部

殿  
殿屋兩瓦墮地

魏文帝問周宣曰吾夢殿屋兩瓦墮地化爲雙鴛鴦此何謂也宣對曰後宮當有暴死者帝曰吾詐卿耳宣對曰夫夢者意耳苟以形言便占吉凶言未畢而黃門令奏宮人相殺魏史

殿而登殿

晉高帝夢殿而登殿顧見武明二帝後一人手張地圖

棟宇

長洲張起

編

而不識問之荅曰順子後說者以爲梁武嗣齊之兆

北史

### 登湛露殿

傅遊藝初除右補闕上書稱武氏符瑞合革姓受命則天甚悅擢爲給事中數月加同鳳閣鸞臺平章事其年九月革命改天授元年賜姓武氏驟承榮寵一夕夢登湛露殿旦而陳於所親爲其所發伏誅

唐書

### 落殿孝子扶上

玄宗嘗夢落殿有孝子扶上他日以問高力士力士云孝子素衣此是韋見素耳帝深然之數日自吏部侍郎拜相

廣異記

殿傍一大漢

成祖一夕夢殿欹側傍一大漢扶而正之次日邢端以監  
生侍宴 成祖見其貌與夢肖遂擢為監察御史 井陘志

孔林登殿

大司成徐公顯卿病癩療之腐而不潰痛楚萬狀肌肉消  
盡幾於殆矣一夕夢至孔林登殿上聞外間隱隱有前呵  
聲頃之人入報啓聖公來視公徐以病狀自歎再三辭以  
不便頃之其人復入云不敢強面矣而呵聲隱隱自殿東  
角而沒頃有二婦捧二合入云啓聖饋食也開視其一合  
惟一瓦器器中惟一熟葫蘆勸徐食徐意難之一婦卽持

去其一復進開視亦一瓦器器中一熟茄徐重違其意卽食之味美甚其婦曰緩之中有鹿肉徐盡食謝之而去覺後口中津津有餘味也次早卽潰潰卽無所痛楚不踰月而愈

坐大殿極上有三穗禾

詳品物部蔡茂大殿官府之象也

宮

黑風破宮

夏桀夢黑風破宮無何有南巢之放宮以墟焉

入章明宮

吳王夫差夢入章明宮公孫聖曰章者戰不勝走倖俚也

明者去昭昭就冥冥也詳地理部

兩錢殖宮牆

吳王夫差夢兩錢殖宮牆公孫聖曰兩錢殖宮牆者越軍入吳伐宗廟掘社稷也詳地理部

廬山西北置一下宮

開元中帝夢神仙羽衛千乘萬騎集於庭中有一朱衣神來謂云我九天使者欲於廬山西北置一下宮自有木料基址但須工力而已帝寤即遣中使詣山果有基址信宿有巨木千數自至堂殿廊宇皆得其用後驗此木蓋昔時九江王所採擬作宮殿沉於湓浦者也

餘夢記

兒在慶寧宮

宋主未立時有不遜語后不樂大臣有不與立太子者陰進廢立之說太后言昨夕一夢甚異見我兒却在慶寧宮坐大哥乘龍上天去大哥者神宗也韓琦卽曰却在慶寧乃是聖躬復舊之兆此亦好夢琦又從容曰太后無親生兒女今皇帝自少鞠於宮中皇后又是外甥乃天安排此兒婦以遺太后不易際會如此豈不愛惜

宋史

衆君子立於社宮

詳名姓部曹人

吾廬冒風雨

洪武中許方知南昌府惓惓於學校嘗夢一儒者曰吾廬  
冒風雨久矣冀太守脩之莫詳所以及見徐孺子像方悟  
遂葺其亭

南昌志

門  
門中側耳

魏仍將赴選祈夢夢見侍郎李彭年使人喚仍於銓門中  
側耳聽之明日解者云門中側耳是聞字已而果得聞喜

夢題院門

黃公度初發鄉舉入試南宮既出院夢題院門曰依舊家  
山萬里重新場屋三年是年以誤用韻榜罷次科赴省試  
乃得第



天祥入門卽仆

京師民某氏一日夢文天祥至其家方入門卽仆而死是年春朱恭靖及第一夕下樓偶失足顛仆良久始甦蓋天祥乃宋丙辰狀元也

湧金門

李學憲夢陽夢走西陸過湧金門有紀夢之作空同集

北首寢廬門之外

詳飛鳥部宋景公

黃熊入寢門

詳走獸部鄭子產

壞大門及寢門而入

詳人身部晉侯

一門不得入

詳人身部陶侃

繞舍三周不知門處

詳地理部敦煌郡

芝產門楣

詳品物部王待制

戶  
釵留戶楣

吳人費季久客于楚時道路多寇妻常憂之季與同輩旅

廬山下各問去家幾時季曰吾去數年矣憶與妻別時戲取其金釵著戶楣上臨發失與道此是夕妻夢季曰吾行遇盜死已二年吾行時嘗取汝釵留戶楣上可往取之妻覺拊釵得之遂成服發喪後一年餘季來歸搜神記想季語時必有鬼物聞而相戲如此

戶已開

詳人身部張興

廟

太子纁卽位於廟

詳爵祿部宋元公

帷幙孟氏廟

詳惟服部孟僖子

蓐收在廟

詳人身部統公

堂

講陰堂之與

周磐年七十三歲會集諸生講論終日因令其二子曰吾日者夢見先師東里先生與我講於陰堂之與既而長歎豈吾齒之盡乎若命終之日桐棺足以周身外椁足以周棺斂形懸封濯衣幅巾編二尺四寸簡寫堯典一篇并刀筆各以一置棺前示不忘聖道其月望日無病忽終學者

以爲知命焉

後漢書

堂內日光自牕中

北魏孝文高后幼年夢在堂內立而日光自牕中照之灼灼而熱后東西避之光猶斜照不已如是數夕怪之以白其父颺颺以問閔宗宗曰此奇徵也昔有夢月入懷猶生天子况日照之徵此女將被帝命誕育人君之象也後入掖庭生宣武追諡文昭

北史

講堂照鏡

詳成器部崔湜

屋

乘龍至屋而止

郭瑀與敦煌索嘏起兵運粟以應王穆後穆聽說將害索

蝦蟆諫不從乃出城大哭舉手謝城曰吾不復見汝矣遂  
輿疾而歸旦夕祈死夜夢乘青龍至屋而止寤而歎曰龍  
飛在天今止於屋屋之爲字尸下至也龍飛至尸吾其死  
乎古之君子不卒於內寢於是還酒泉南山赤崖閣飲氣  
而卒

晉書

### 屋壞

趙王倫將廢賈后張華方晝寢夢見屋壞覺而惡之是夜  
難作華遂被害

晉書

### 屋舍傾壞

晉安北將軍司馬恬於病中夢見一老翁曰我鄧公屋舍

傾壞君為治之後訪之乃知鄧艾廟在京口草蓋乃為立瓦屋隆安中有人與女子會於神座上有一蛇來繞之數匝女家追尋見之禱祠不解而死

幽冥錄

梁棟坐屋梁柱上

沈瑀在竟陵王家素與范雲善齊末就雲宿夢坐屋梁柱上仰見天中字曰范氏宅後雲經沈攸之之變屢瀆於殆幸而獲免至是瑀為高祖說之高祖曰雲得不死此夢可驗

梁書

屋棟飾黃土

鄭處誨登進士累遷工部侍郎時族父朗為定州節度使

處誨因早朝假寐於待漏院忽夢已爲浙東觀察使而朗  
爲汴帥留連飲餞仰視屋棟飾以黃土賓從皆所識明年  
朗果自定州鎮宣武辟韋重掌書記重將行處誨告以所  
夢明年處誨轉刑部侍郎其年秋授浙東觀察使行及潼  
關朗遣從事迎勞仍致手書令先疏所夢比至汴宴於清  
暑亭賓佐悉符夢中朗仰視屋棟曰此亦黃土也四座感  
歎無何處誨朗相繼卒

唐書

棟梁戶牖皆金飾

朱士美宣和初被選入京夢遊一室棟梁戶牖皆以金飾  
之後乃調金堂尉

夢譚



三人潛伏梁間

金蒲察琦以刑部掾襲謀克守緒遷歸德汴京立講議所  
琦與其選與同事元好問交相得崔立變後令改易巾髻  
琦謂好問曰此事在京人皆可琦獨不可今以一死付公  
然死則死付公一言亦剩矣遂涕泣而別琦至其家母方  
晝寢驚而寤琦曰阿母何為母曰適夢三人潛伏梁間故  
驚寤琦跪曰梁上人鬼也兒意在懸梁母夢先見耳家人  
輩泣且勸曰君獨不念老母歟母曰毋庸勸兒所處是矣  
琦卽自縊

金史按琦一人欲懸梁而母  
乃夢三人豈精鬼神之謂耶

室  
日出室內

北魏主拓跋珪母賀皇后初因遷徙游於雲澤寢夢日出  
室內寤而見光自牖屬天欽然有感以建國三十四年七  
月七日生帝於參合陂北其夜復有光明

北史

### 日光滿室

哲法師母曹氏嘗夢日光滿室因有娠是生師則天臨朝  
屢徵不起開元間示化於聚福寺

汾州志

### 火藝寢室

詳燈火部崔浩

宅  
數十人料理宅舍

劉沙門居彭城病亡妻貧兒幼遭暴風雨牆宇破壞其妻

泣擁穉子曰汝命若在豈至於此其夜夢沙門將數十人料理宅舍明日完矣

甄異傳

楹

奠兩楹之間

孔子蚤作負手曳杖消搖於門歌曰泰山其頽乎梁木其壞乎哲人其萎乎既歌而入當戶而坐子貢聞之曰泰山其頽則吾將安仰梁木其壞哲人其萎則吾將安做夫子殆將病也遂趨而入夫子曰賜爾來何遲也夏后氏殯於東階之上則猶在阼也殷人殯於兩楹之間則與賓主來之也周人殯於西階之上則猶賓之也而丘也殷人也予疇昔之夜夢奠於兩楹之間夫明王不興而天下其孰能

宗予子殆將死也蓋寢疾七日而沒

禮記按古木梁木其壞下有則吾將安仗

五字

### 左廊右廊

蜀僧悟詮有慧性峽州富人程夷伯年二十九一夕夢其父曰汝今年當死可問悟詮其人茫然不曉一日有僧說相負悟詮字程請一相問云我壽幾何詮曰老僧無求但覓一杯水呵氣入水中令程飲之曰今夜有吉夢可相報卽夜夢至一官府左廊下男子婦人衣冠嚴整皆相欣悅右廊盡枷鎖縲紲之人哀號涕泗傍有人云左廊是修捨橋路人右廊是毀壞橋路人若爾要福壽可自擇取程夢

覺發心凡百里之內橋梁道路一一修整工畢僧復來云  
汝作此事可延十年程自是於道路上用工不倦壽九十  
二五世昌 神僧傳

齋 願父暫出東齋

齊董青建既死其父賢明於閏月十一日夢建云願父暫  
出東齋至十四夜聞建喚聲驚起見建在齋前如生時備  
言冥中得佛力賢明遂以出家名法藏云 法苑珠林

經德齋生為省元

紹興初有夢經德齋生為省元者時太學諸齋無經德之  
名至二十七年祭酒周綰請增三齋曰節情經德立禮至

乾道間何澹從經德齋冠南宮此夢兆於三十年之前云  
樓  
帶印綬登樓而歌

張奐為武威太守其妻懷孕夢帶印綬登樓而歌訊之占  
者曰必將生男復臨茲邦命終此樓既而生子猛以建安  
中為武威太守殺刺史邯鄲商州兵圍之急猛恥見擒乃  
登樓自燒而死卒如占云  
通鑑綱目

萬歲樓上挂冰

李鑄初與韓臯不協及鎮浙右夢萬歲樓上挂冰因自解  
曰冰者寒也樓高處也豈韓臯來代我乎未幾臯果自鄂  
州移治浙  
因話錄

登樓與坐席

詳帷服部柳遐

臺 白臺四望無所見

北魏樂平王不夢登白臺之上四望無所見日者黃道秀筮之以爲大吉王默而有喜色後事發王遂憂死道秀棄市高允著筮論以爲當時道秀若推六爻以對當曰易稱亢龍有悔窮高曰亢高而無民也如是則上寧下保福祿方至豈有禍哉今舍本而從末爻之至不亦宜乎

北史

登臺遇蛇化龍

董遵誨父宗本仕漢爲隨州刺史宋主微時往依焉遵誨

馮藉父夢嘗侮之一日謂宋主曰每見城上有紫雲如蓋  
夢登高臺遇黑蛇約長百丈餘俄化龍飛騰東北去雷電  
隨之是何祥也宋主皆不對他日論兵遵誨理屈拂衣起  
宋主乃辭宗本去及卽位遵誨被召伏地請死宋主諭之  
曰卿尚記曩日紫雲黑蛇之事乎遵誨再拜呼萬歲

通鑑

亭  
秦亭

余靖嘗夢神人告以官止工部尚書而死秦亭後至是官  
常畏過秦及安撫廣西代歸時年已六十五途卒其處則  
江寧府秦淮亭也

一亭扁曰侍康



宋吳近夢至一亭扁曰侍康未幾生女年十四時高宗爲

康王選入宮乃徵侍康之兆後進位皇后

夢談

觀人登昆吾之觀

詳人身部衛侯

城 羸袒冠幘踰城

彭寵妻夢羸袒冠幘踰城兒徒推之五年春寵齋獨在便  
室蒼頭子密等三人因寵臥寐共縛着牀告外吏云大王  
齋禁皆使吏休僞稱寵命教收縛奴婢各置一處又以寵  
命呼其妻妻入大驚寵急呼曰趣爲諸將軍辨裝於是兩  
奴將妻入取寶物留一奴守寵寵謂守奴曰若小兒我素

愛也今爲子密所迫劫耳解我縛當以女珠妻汝家中財物皆與若小奴意欲解之視戶外見子密聽其語遂不敢解於是收金玉衣物至寵所裝之被馬六疋使妻縫兩縑囊昏夜後解寵手令作記告城門將軍云今遣子密等至子后蘭卿所速開門出勿稽留之書成卽斬寵及妻頭置囊中便持記馳出城因以詣闕

後漢書

### 黃衣圍城

陳後主夢黃衣圍城乃盡去繞城橘樹及韓擒虎賀若弼兵不久入建康乃知圍城之兆云

### 蔡生城內

詳植物部苻堅

帶

任城家四面牆崩

詳什百部中山王熙

桁

勿渡朱雀桁

徐羨之爲王雄少傅主簿夢父作謂曰汝從今以後勿渡朱雀桁當貴羨之後行半桁憶先人夢急迴馬幾蹶而起後果至宰相

幽明錄

梯

空中一梯雲繞

莆田鄭僑惠叔乾道己丑春省試中選未廷對夢空中一梯雲氣圍繞竊自念曰世所謂雲梯者茲其是歟俄身至

雲梯側遂登之及高層仰望則有大石蒼然如鏡面正懼  
壓已忽冉冉昇騰立於石上驚覺自喜但不曉登石之義  
既而爲天下第一其次曰溫陵石起宗先是考官用分數  
編排石當居上臨唱名始易之云

容齋隨筆

井  
井中生菜

何祇夢井中生菜以問占夢趙直直曰菜非井中之物會  
當移植然菜字四十下八壽恐不過此祇後至健爲太守  
年四十八果卒

蜀志

井中有人

黃榦通判安豐軍時淮西帥司檄鞫和州獄獄故以疑未

決榦夜夢井中有人果於廢井得尸

宋書

清明日淘井

詳文翰部蘇軾

竈

竈上生樹

詳品物部霍顯

廁 鹵簿入廁中

宋沈慶之在文帝時夢引鹵簿入廁中意惡之占者曰君必大富貴然不在旦夕間鹵簿固是富貴容廁中所謂後也知君富貴不在今主慶之果以孝武時出登三公

宋書

成器部

博具附

鼎  
負鼎抗狙而笑

商湯思賢夢有人負鼎抗狙對已而笑寤而占曰鼎為和  
味狙者割裁天下豈有人為吾宰者哉未幾得伊尹世說

神人覆鼎

景雲元年楊氏選入太子宮時太平公主用事忌東宮宮  
中左右持兩端而潛附太平者必陰伺察雖纖芥皆聞於  
上太子心不自安楊時方娠太子密謂張說曰用事者不  
欲吾多息胤恐禍及此婦人其如之何密令說懷去胎藥  
而入太子於曲室躬自煮藥醺然似寐夢神人覆鼎既寤  
如夢如是者三太子異之皆說說曰天命也既而太平誅

太子卽位是爲玄宗立楊氏爲后果生肅宗

唐書

### 投湯鼎

趙汝愚嘗夢孝宗授以湯鼎背負白龍升天後真寧宗以素服登大寶蓋其驗也

宋史

### 二人扛油鼎自樓而上

楊汝南每試輒夢人以油沃其首榜出卽無名至紹興乙丑候榜卽不敢就寢夜闌則聞牖下僕睡中呻吟急呼之云夢二人扛油鼎自樓而上來覓主人見主在坐執而沃之我夢中與爭耳汝南聞之大悵及觀榜有名第其名上有油蹟蓋寫榜時秉燭更所污也

爐盒

天人手執香爐

梁陶弘景母有娠夢青龍自懷而出再見兩天人手執香爐來至其所已而遂產弘景爲山中宰相得道享遐壽云  
眇目僧執香爐托生

梁武帝夢眇目僧執香爐托生王宮既而有采女阮氏次侍始褰戶幔有風回裾帝意感而幸之遂生繹初生患眼醫療必增武帝自下意療之遂盲一目乃憶先夢彌加愍愛後封湘東王是爲元帝

梁書

手執香盒

宋如璋將入試謁龍泉神廟有一僧來附耳語曰公春闈



定提問之不荅而去已而果得第其僧入京來訪訊其名  
曰元通問其故曰公未至前一日夢皓首人來語翌日有  
官到此問官爲誰曰手執香盒者是也問名曰宋如璋至  
日諸公皆來或澡羞或捧筆而公獨執一香盒訊從者以  
名亦與夢合是以知之但當時不欲明言耳

龍泉夢記

鏡欲別况

隋汾陰侯生奇士也王度常師事之度自御史罷歸河東  
適遇侯生將終以古鏡贈度云黃帝鑄十五鏡此第八鏡  
也持此則百邪遠人度受而寶之試以禁邪多靈異大業  
十年度弟勳將遍遊名山爲探奇之計向度乞得此鏡持

以行每遇妖異輒爲禁伏至廬山遇處士蘇賓洞明易道  
謂勣曰天下神物必不久居人間今宇宙喪亂他鄉未必  
可止吾子有寶鏡當衛而速歸勣以爲然卽北歸便遊河  
北夜夢鏡謂勣曰我蒙卿兄厚禮今當舍人間遠去欲得  
一別卿兄請早歸長安勣夢中許之及曉西首秦路欲令  
鏡與兄見及還河東度旣見鏡匣中悲鳴其聲纖遠俄而  
漸大若龍咆虎吼良久乃定開匣視之已失鏡矣時大業  
十三年七月十五日也

括異聞集

神僧授以寶鑑

釋靈坦姓武氏則天姪孫母夏侯氏初姪坦夢神僧授以

寶鑑且曰吾以此寄汝善保護之及長叅神會禪師忽聞空中聲云開心地卽見菩薩如文殊像曰與汝印驗令舉頂以手按之尋觀有四指赤痕其印跡恒見後壽至一百八神僧傳

講堂照鏡

崔湜爲太平公主所引超拜中書令湜亦私附公主以自固及玄宗將誅蕭至忠等湜弟滌謂湜曰主上若有所問不得有所隱也湜不從及見上對問失次至忠等旣誅湜坐徙嶺外時新興王晉亦連坐伏誅臨刑歎曰本謀此事出自崔湜今我就死而湜獨生何冤濫也俄而所司奏宮

人元氏款稱與湜曾密謀進鳩乃追賜湜死時湜與尚書右丞盧藏用同配流俱行湜謂藏用曰家弟承恩或冀寬宥因遲留不速進行至荊州夢於講堂照鏡曰鏡者明象吾當為人主所明也以告占夢人張由由對曰講堂者受法之所鏡者於文為立見金此非吉徵其日追使至縊於

驛中

唐史

佛鎮

塵尾書鎮

釋曇諦父康彤書為冀州別駕母黃氏晝寢夢一僧呼黃為母寄一塵尾并鐵鏤書鎮二枚既覺見兩物具存因懷孕生諦諦年五歲母以塵尾等示之諦曰秦王所餉後隨

父之樊鄧見關中僧碧

音碧

道人忽喚碧名碧曰童子何以

呼宿老名諦言碧經為弘覺法師弟子為僧採菜被野豬

所傷碧初不憶迺詣諦父諦父具說本末示以麈尾書鎮

碧迺悟而泣曰即先師弘覺法師也師經為姚萇講法華

萇餉師二物追計弘覺捨命正是寄物之日

神僧傳

杆遺已大秤

上官昭容名婉兒在孕時其母夢人遺已大秤占者曰當

生貴子而秉國權衡既生女聞者嗤其無効及婉兒長有

文詞明習吏事自聖曆以後百官表奏多令參決中宗即

位又令專掌制命果如占者之言時有游宴唱和亦多次

第諸臣之詩猶秉權衡焉特以淫亂撓政故不免旗下之

誅

唐書

鏗

兩鏗蒸而不炊

吳王夫差夢兩鏗蒸而不炊公孫聖曰蒸而不炊者不得  
火食也詳地理部

牀

移公牀

徐孝嗣字始昌曾在率府畫臥北壁下夢兩童子遽云移  
公牀孝嗣驚起壁有聲行數步而壁倒壓牀

談數

繩牀去地數丈

安祿山反遣大理主簿召皎送表至京玄宗覽之不悅但

傳詔皎還皎出中書見國忠問送胡之表無乃勞耶賴其不相罪狀設有惡言亦當送之乎呵使速去皎還至戲口驛意甚忙忙臥廳上繩牀夢繩牀去地數丈仰視見一人介冑中立呵叱左右二十餘人令撲之雖被拖拽廳上復有一人短帽紫衣來云此非蔣清無宜殺也遂見釋放皎數日還至洛尋而逆徒亦至皎與流輩數人守扃待命悉被收縛皎長大有容止而行居前往見賊將田乾貞乾貞介冑而立即前牀間所夢者也逆呼皎云何物小人敢抗王師命左右撲殺嚴莊遽從廳上曰此非蔣清無宜加罪乾貞方問其姓云姓召因而見釋次至蔣遂遇害

廣異記

大海坐胡牀指麾

金華苗軍作亂殺叅政胡大海 上痛念之追封越國公  
初大海未遭難前一日嘗夜出人見其兩目炯炯有光若  
紅燈及旣薨敵兵有犯境者軍中輒夢大海坐胡牀指麾  
方略儼如生時或夜見火光遍野洶洶若數萬人馬聲師  
出輒大捷似有陰助

明興祿記

爲日所逐避牀下

詳日部魏世宗

白 白水出東走

伊尹毋居伊水上有娠夢有神告之曰白水出而東走無



顧明日視白出水告其鄰東走顧其邑盡為水身因化為  
桑有莘氏採桑得嬰兒空桑之中獻之於君君令乳之命  
曰伊尹呂氏春秋

炊臼中

齊賈張贍將歸夢炊臼中問王生生日君歸不見妻矣白  
中炊無釜也張歸妻已卒酉陽雜俎

杵  
以杵指腹

宋紹興間明州王氏隨夫之任懷胎過期不產羸病漸深  
一夕夢金剛神以杵指腹疼不可忍及覺已生二男在牀  
執金杵撞三人

張應至馬溝市鹽還泊蕪湖夜宿夢三人以鈎釣之將北去應素與高僧覺鐘善欲呼其名忘之但喚和尚救我有頃有一長人從西方執金杵欲撞三人三人皆怖散長人引應去謂曰汝命盡不復生可暫還家頌唄三偈并取和尚名字三日當復命過卽生天矣應卽避三日中持齋頌唄遣人將疏取曇鑑名至日食畢與家人辭別澡沐冠帶而逝

法苑珠林

劔  
立祠求劔

弋陽郡東南有黑水河河湄有黑水將軍祠太和中薛用弱自儀曹郎出守爲政嚴而不殘一夕夢人云黑水將軍

至延之乃魁岸丈夫鬚自雄傑介金附鞬既坐曰某頃溺  
於茲水自以秉仁義之心未展上訴於帝帝曰爾陰位方  
崇遂授此任郎中可爲立祠河上當保佑斯民聞君有葛  
谿寶劍願以爲贈薛既寤遂命建祠設祭水旱災沴禱之  
仍刳神前柱匣劍寘之有無賴者以廟劍言於賊裨將將  
乃率徒破柱取去既而曉出縱掠烟霧四合莫知所如忽  
遇一樵童令前導霧開乃義管張周寨也周親擒之解其  
劍復歸諸廟

三水小牘

### 帶劍上樹

王大臨赴試夢帶劍上樹斫桂一枝甚喜及舟次劍江以

銀盃嗽口墮之急自取之身亦隨溺及得其尸手執桂一枝乃知帶劍者劍江也

六印加劍上

詳旂常部凌策

刀 三刀益一刀

王濬爲巴郡太守夜夢懸三刀於屋梁上須臾又益一刀濬驚覺意甚惡之語主簿李毅毅再拜賀曰三刀爲州字又益一者明府其臨益州乎已而果遷益州刺史

晉書

索千牛刀

爾朱榮旣害朝士於河陰立莊帝葛榮稱兵向京師衆號

百萬爾朱榮將與之戰夜夢一人從葛榮索千牛刀榮初不肯與此人自稱為道武皇帝葛榮乃奉刀道武持以授爾朱榮榮寤而喜曰知必勝果於陣禽葛榮

北史

寶刀授已

陳舊夢梁武帝以寶刀授已及陳武帝授禪立舊為臨川

王

南史

持六刀

宋洪興祖夢持六刀覺曰三刀為益今倍之其饒乎已而擢知饒州

躍刀戲其前

胡章與管雙善二人皆好干戈雙死後章夢雙躍刃戲其  
前心畏惡之明日以符帖壁章偶泛舟出忽見雙來攀留  
之云夫人相知情貫千載昨夜就卿戲值眠吾卽去今何  
故以符相厭我畏符乎

稽明錄

### 束草啣刀

江南有李令者累任大邑假秩至評事世亂年老無復宦  
情築室于廣陵法雲寺之西爲終焉之計嘗夢束草加首  
口啣一刀兩手各持一刀入水而行意甚異之俄而孫儒  
陷廣陵儒部將李瓊屯兵于法雲寺恒止李令家父事令  
及儒死裨將馬殷劉建封輩與瓊率衆南走瓊因彊令俱

行及殷據湖南瓊為桂管觀察使用令為荔浦令荔字草  
下三刀即前夢之驗也

稽神錄

持刀落十指節

詳人身部魏莊帝

弩 執弩驅羊

黃帝夢人執千鈞之弩驅羊數萬群寤而歎曰天下豈有  
姓力名牧者求之得力牧於大澤進以為將

世說

弓 賜弓乘船入海

扶南國俗本裸身被髮以女人為王號曰柳葉年少壯健  
有似男子其南有徼國有事鬼神者字混填夢神賜之弓

乘賈人舶入海混填晨起卽詣廟於神廚下得弓便依夢  
乘船入海遂入扶南外邑柳葉人衆見舶至欲取之混填  
卽張弓射其舶穿度一面矢及侍者柳葉懼舉衆降混填  
混填乃教柳葉穿布貫頭形不復露遂治其國納柳葉爲  
妻生子分王七邑

梁書

### 弓射狗

河東裴元質初舉進士明當唱策夜夢一狗從竇出挽弓  
射之其箭遂擊以爲不祥問曹良史良史曰吾往唱策之  
夜亦爲此夢夢神爲吾解之曰狗者第字頭也弓第字身  
也箭者第豎也有擊爲第也尋而唱第果如夢

朝野僉載



靈根可變此弓

詳走獸部傳融

箭

三箭插龜上

王文恪整以乙未上春宮時徐文靖溥主考久之未得魁  
卷徐默禱於天以祈夢兆乃夢至一所大浸茫茫不見水  
端忽有大物若龜昂首登岸以三箭插其上及揭榜王第  
一意以大浸渺漫王家在太湖也三箭者三元王初發解  
暨會試第一深以狀頭為望及廷試乃第三遂以為夢不  
盡驗矣後王在翰林以徐薦為學士為少詹事王乃往謝  
曰前夢三箭今應矣薦會試一也薦學士二也薦詹事三

也徐曰不然始吾夢插箭為品字之象其一品之兆乎王不敢當後王登政府秩一品云

矛 使者手持矛戟

釋慧約季父喜田獵約勸之不止避於他里恣行勦戮一夕夢赤衣使者手持矛戟謂曰汝終日殺生菩薩教化又不能止捉來就死驚覺汗流且便毀諸獵具約後至其獵處有麋鹿數十騰躍隨船若有愧謝者

神僧傳

屏 印手文於屏

唐開元中宮禁有美人忽夜夢被人邀去縱酒畧會極歡而歸歸輒流汗倦怠後因從容奏於帝帝曰此必術士所

為也汝若復往但隨宜以物識之其夕熟寐飄然又往美人半醉見石硯在前乃密印手文於曲房屏風之上寤而啓帝乃潛以物色令於諸宮觀中求之果於東明觀得其屏風手文尚在所居道士已遁矣

開元傳信記

杖 與杖飲以藥酒

詳飲食部樂安太守

漆器 執漆器

王弼著易夢執漆器隨孔子南行

梁書以為劉  
勰詳聖賢部

節 巨篩紅豆成人

宋軋德中伐金陵城破或夢一女子以巨篩篩落紅豆成

人須臾一貴人盛冠服墮地云徐舍人也既寤聞徐錯死

鎖

菱鞋鎖

劉照建安中爲河間太守婦亡埋棺於府園中遭黃巾賊  
照委郡走後太守至夜夢見一婦人往就之後又遺一雙  
鎖太守不能名婦曰此菱鞋鎖也以金縷相連屈申在人  
寶珍物吾方當去故以相別慎無告人後二十日照遣兒  
迎喪守乃悟以鎖示兒兒見鎖感慟

錄異傳

奕奕

對奕投劍

梁大通三年徵晉安王綱入朝未至而昭明太子統謂左  
右曰我夢與晉安王對奕我以班劍授之曰王當有此至

嘉平四月昭明太子薨立晉安王爲太子

梁書

龍吐碁經

唐翰林學士王積薪夢青龍吐碁經九部授之藝乃精

二道士奕碁

李泰伯母初無子祈禱無所不至祥符二年夢二道士奕碁戶外往觀之其一人取局之一子授焉遂孕生泰伯

雙陸不勝

天后欲以武三思爲太子問宰相曰朕數夢雙陸不勝何也狄仁傑與王方慶俱在二人同辭對曰雙陸不勝無子也天其意者以做陛下乎且太子天下本本一搖天下危

矣文皇帝身蹈鋒鏑勤勞而有天下傳之子孫先帝寢疾  
詔陛下監國陛下掩神器而取之十有餘年又欲以三思  
爲後且姑姪與子母孰親陛下立廬陵王則千秋萬歲後  
常享宗廟三思立廟不祔姑后感悟卽日遣徐彥伯迎廬

陵王於房州

唐書

殷子  
六赤

贈龍州李郎中先夢六赤後因打葉子因以詩上云紅蠟  
香烟撲盡楹梅花落盡庾樓清光輝圓魄啣山冷彩鏤方  
牙着腕輕寶帖牽來御子鎮金盆引出鳳凰傾微黃喜兆  
莊周夢六赤重新擲印成

李洞集按卅鉛總錄云六赤者  
占之覆髮今之殷子也葉子如

今之紙裱滙令鄭氏書目有南唐李後

主妃周氏編金葉子格此戲今少傳

擗蒲 席地擗蒲

詳爵祿部崔龜從解者曰蒲者蒲也後當臨蒲州

舟車部

舟 乘舟判爲二

義陽王琮與二弟同死桂林開元四年其子行休請身迎  
柩既至無封樹議者謂不可復得行休歸地布席以祈夢  
夢王乘舟舟判爲二既而適野見東州中斷乃悟行休既  
至趣其所發之如言而一節獨闕行休號而寢夢琮告曰  
在洛南州明日直殯南得之於是以三喪歸史

合兩船

劉穆之常渡揚子江宿夢合兩船爲舫上施華蓋儀飾甚盛乘以升天旣曉有一姥問曰君昨夜有佳夢否穆之乃具說之姥曰君必位居端揆言訖不見後以元功官至僕射丹陽尹

異苑

童子乘寶船來投

釋智曠姓王氏初母將孕夢入流浴童子乘寶船來投旣覺便有娠是生曠

神僧傳

張果老撐鐵船

政和間吉水楊塢將應舉夢神告之曰汝欲中式須待張



果老撐鐵船既覺以為無望矣及建炎渡江庶事草創詔  
貢院有遭兵火者權就寺觀而吉州在能仁寺墳入試坐  
廊廡間壁上有畫張果老撐鐵船事墳見之大喜放榜遂  
有名

夢談

### 道士飛舶入國

閩婆國王母夜夢一道士飛舶入國明旦乃是求那跋摩  
來至王母敬以聖禮從受五戒

神僧傳

### 白衣女子舟覆

元豐四年夏駕里民羅滿於水中獲一石觀音像供于家  
時慧聚寺僧守齋夜艤舟于此夢白衣女子曰我舟覆父

與夫皆溺死師幸容我守齋拒之女曰假一篋宿何傷守齋開篋納之遂驚悟迄旦至羅氏家見石觀音如初出水身猶沮洳守齋默念與夢合因乞以歸姑蘇志

乘船赴任

蜀葉逢夢乘船赴任江上候吏旁午迎入石窟忽報勅下授水部檢校員外郎後覆舟於犍爲郡青衣灘而死

吾舟挈汝

陳楊王本維揚尺籍當宋祚將傾卮蹕南還師次海島將殞軍崩士卒死溺公從波濤中躍而登岸招携瘡殘匍匐沙嶼累石支釜調糜苟活已而食盡衆得一死馬欲食之

王疲睡夢白衣人謂王勿食馬肉吾舟挈汝夜未央櫓聲  
入耳若寤若寐復有紫衣人杖觸王膝曰舟且至奈何不  
起王驚立熟視身已在舟中食頃颶風發舟如輪轉王素  
諳巫呪叩齒揮神須臾風息舟人謝王競進酒食既歸故  
里避地盱眙久之生二女季卽 淳皇后也作配 仁祖  
誕育 高皇聖躬王享年九十有九

狀元舟在山前

張狀元昇父挈之赴京會試舟次小姑山下昇父夢山上  
數女郎執絳紗燈擁仙姑而下因問之曰仙姑何往荅曰  
江西張狀元舟在山前將往訪之覺而呼昇語其事是科

果及第

客坐新聞

附舟羅狀元

羅脩撰倫赴試時有一舟師夢人語之曰明日附舟乃羅狀元明早果有秀才來附舟詢其姓與夢合衆皆驚訝後果爲成化丙戌狀元

易舟上封條

羅宗伯萬化赴會試至杭州北新關忽夢一老人白衣青巾從浮橋下舟揭舟上會試封條易以第一甲第一名數字隨恍惚而寤及廷試夢果驗云

狀元錄

翁姥持橈楫

秣陵人趙伯倫嘗往襄陽船人許以豕爲禱及祭但侘肩而已是夕倫等夢見一翁一姥髮首蒼素皆著布衣手持橈楫怒之明發輒觸沙衝石皆非人力所禁更施厚饌乃獲濟

幽明錄

二白龍夾舫

詳地理部劉穆之

車

乘丹車駕朱馬

秦王子嬰常寢於望夷宮夢有人身長十丈鬚髮絕偉納王舄而乘丹車駕朱馬至宮門云欲見秦王嬰闢者許進焉謂嬰曰予天使也從沙丘來天下將亂當有所誅暴者

王子年拾遺記然則丹車  
朱馬其赤帝子之兆乎

### 車騎聲謹

霍禹夢車騎聲正謹來捕禹會事發覺禹要斬

漢書

### 車騎滿門

漢何比干夢有貴客車騎滿門覺以語妻子未已門首有  
老姥年可八十餘求避雨雨甚盛而衣不沾濡比干延入  
禮待之乃曰君先出自后稷佐堯至晉有陰功今天賜君  
策如簡長九寸凡九百九十枚以授之曰子孫能佩者富  
貴言訖出門不復見

幽明錄

### 黑憶繞車

陸機叅成都王穎軍事假都督討長沙王義兵敗爲穎嬖  
人孟玖所譖將見收一夕機夢黑憶繞車手決不開及穎  
遣牽秀兵至遂遇害於軍中

晉書

### 乘車挂肉其傍

易雄爲春陵令從譙王承拒王敦馳檄遠近列敦罪惡已  
而力屈城陷被虜敦遣人以檄示雄而數之雄曰此實有  
之惜雄位微力弱不能救國之難王室如燬雄安用生爲  
今日卽戮得作忠鬼乃所願也敦憚其辭正釋之衆皆賀  
雄笑曰昨夜夢乘車挂肉其傍夫肉必有筋筋者斤也車  
傍有斤吾其斬乎尋而敦遣殺之

晉書

刁協乘輅車

王敦犯石頭夜夢刁協乘輅車導從瞋目令左右執之既覺病轉劇自知必死乃囑錢鳳曰我死之後釋兵歸朝保全門戶上計也退還武昌收兵自守貢獻不廢中計也及吾尚存悉衆而下萬一僥倖下計也鳳從其下計無何敦死鳳等亦伏誅

晉書

乘車在山下行

梁秣陵令朱貞以罪下獄廷尉虞獻覆其事結証入重典貞遣相知謂獻曰我罪當死不敢祈恩但猶與主上萬一弘宥明日是國家忌日乞得過此奏聞可乎獻荅曰此於



理無爽何謂不可適遇客飲醉遂忘抽文書旦日家人合束內衣箱中比至帝前頓束香案上次第披之方見此等勢不可隱便爾上聞武帝以為合死付外詳決貞聞之大恨曰虞獻小子欺罔將死之人鬼若無知固同灰土儻有識誓必報之貞始命絕而獻已見其來甚惡之獻又夢乘車在山下行貞于山上推石壓之居月餘獻除曲阿令拜命之明日詣謝門下其婦暴卒于家獻狼狽而還入室哭婦舉頭見貞在梁上獻曰朱秣陵在此我婦豈得不死于時屋無故忽崩獻及男女婢使十餘人一時併命宗人虞騰助其喪事走下堂避之得免

還宛記

車中載日月

唐鄭光於會昌六年夢車中載日月光芒燭六合占者曰必暴貴無何唐武宗登遐宣宗卽位而孝明皇后鄭氏宣宗之母卽光之姊也光以元舅之尊檢校戶部尚書諸衛將軍出爲平盧節度使

唐書

邀車駕

周顯德中宋太祖尚幼從辛文悅肄業文悅夜夢邀車駕明日請見乃太祖也

周書

挽車三十輛

潘擇可貢入京師夢挽車三十輛其弟端甫隨其後時宗

寧五年也至政和三年端甫始就恩科相去已三十年乃

悟挽車者三十載也

吳中舊事

### 雲輿羽蓋蔽空

鄭儷女年十六名采娘七夕夜陳香筵祈於織女是夜夢雲輿羽蓋蔽空駐車命采娘曰吾織女汝求何福曰願工巧耳乃遺一金針長寸餘綴裙帶中令三日勿語汝當奇巧史遺

### 登車見殿宇

范司成應期會試至張秋水雪載塗將從陸夜夢一躍登車有一長人授之以鞭乃手執鞭立車前車行如飛若將

入雲忽二吏跪報曰玉殿已近舉目見殿宇門鏤金書三  
大字既傳臚恍若夢中所見云

狀元錄

乘桓溫輿

詳什百部謝安

朱輦白獸行草間

詳英靈部元世祖

車中猴

詳走獸部尼妙寂

御秋駕

尹儒學御三年而無得焉夜夢受秋駕於師明日往朝其

師師謂之曰吾非愛道也恐子之未可與也今日將教子  
以秋駕秋駕御法也尹儒反走北面再拜曰昔臣夢受之先爲  
其師言所夢固秋駕也呂氏春秋

夢占類考卷五